

欽定北史

卷八十之八十六

欽定北史

卷之六

北史卷八十

唐

李

延

壽

撰

列傳第六十八

外戚

賀訥

姚黃眉

杜超

賀迷

閻毗

馮熙

李惠

高肇

胡國珍

從曾孫
長榮

楊騰

乙弗繪

趙猛

胡長仁

隋文帝外家呂氏

夫左賢右戚尙德尊功有國者所以御天下也殷肇王基不藉華氏爲佐周成王業未聞嬖姓爲輔然歷觀累代外戚之家乘母后之權以取高位厚秩者多矣而鮮能有克終之美必罹顛覆之患何哉皆由乎居上不以至公任物在下徒用私寵要榮繭犢引大車升質任厚棟無德而尊不知紀極忽於滿盈之戒罔念高危之咎故鬼瞰其室憂必及之所以殺身傾族相繼於西京也夫誠著艱難功宣社稷不以謙沖自牧未免顛蹶之禍而況道不足以濟時仁不足以利物自矜於己以富貴驕人者乎魏道武初賀訥有部衆之業翼成皇祚其餘或以勞勩或緣恩澤齊氏后妃之族多自保全胡長仁以譖訴貽禍斛律光以地勢被戮俱非女謁盛衰之所致也婁昭自以佐命之功崇其名器且霸業權輿時方同德陵暴之釁因

茲而起其靖德昭訓二門並良家遺孽守死無暇固不足涉言又子非繼世權難妄假昭信非惟素門履道訖構廢辱威望之地自致無由有周御厯后門初無與政旣而未跡竊權竟移鼎璽斯乃西漢覆車之轍魏文所以深誠隋文潛躍之初獻后便相推轂煬帝大橫方兆蕭妃密勿經綸是以恩禮綢繆始終不易然外內親戚莫預朝權昆弟在位亦無殊寵至於居擅玉堂家稱金穴暉光戚里熏灼四方將三司以比儀命五侯而同拜者終始一代寂無聞焉考之前王可謂矯其弊矣故雖時經擾攘無有陷於不義市朝遷貿而皆得以保全比夫憑藉寵私階緣恩澤乘其非據旋就顛隕者豈可同日而言哉此所謂愛之以禮者也案外戚魏書有賀訥劉羅辰姚黃眉杜超賀述閼毗馮熙李峻李惠高肇于勁胡國珍李延實齊書有趙猛婁叡余朱文暢鄭仲禮李祖昇元蠻胡長仁周書不立此篇隋書有獨孤羅蕭歸今以劉羅辰李峻于勁李延實婁叡余朱文暢鄭仲禮李祖昇元蠻獨孤羅蕭歸命附其家傳其餘並入此篇又檢楊騰乙弗繪附之魏末以備外戚傳

賀訥代人魏道武帝之舅獻明后之兄也其先世爲君長祖紇尙平文女父野干尙昭成女遼西公主昭成崩諸部乖亂獻明后與道武及衛秦二王依訥會符堅使劉庫仁分攝國事道武還居獨孤訥總攝東部爲大人遷居大寧行其恩信衆多歸之侔於庫仁符堅假訥鷹揚將軍後劉顯謀逆道武輕騎歸訥

計擒拜曰官家復國當念老臣帝笑答曰誠如舅言要不亡也訥中弟柒干寵暴忌帝常圖爲逆每爲皇姑遼西公主擁護故柒干不得肆其禍心諸部大人請訥兄弟求舉道武爲主柒干不從遂與諸大人勸進道武登代王位于牛川及帝討吐突隣部訥兄弟遂懷異圖率諸部救之帝擊之大潰訥西遁衛辰遣子直力韃征訥告急請降道武簡精騎二十萬救之遂徙訥部落及諸弟處之東界訥又通於慕容垂垂以訥爲歸善王柒干謀殺訥而代立訥遂與柒干相攻垂遣子麟討之敗柒干於牛都破訥於赤城道武遣師救訥麟乃引退訥從道武中原拜安遠將軍其後離散諸部分土定居不聽遷徙其君長大人皆同編戶訥以元舅甚見尊重然無統領以壽終於家訥弟盧亦從平中原以功賜爵遼西公帝遣盧會衛王儀伐鄴而盧自以帝之季舅不肯受儀節度帝遣使切責之盧遂忿恨與儀司馬丁建構成其嫌彌加猜忌會道武敕儀去鄴盧亦引歸道武以盧爲廣川太守盧性雄豪恥居冀州刺史王輔下襲殺輔奔慕容德德以爲并州刺史廣甯王廣固敗盧亦沒訥從父弟悅初道武居賀蘭部下人情未甚附唯悅舉部隨從又密爲帝祈禱天神請成大業出於誠至帝嘉之甚見寵待後平中原以功賜爵鉅鹿侯進爵北新卒子泥襲爵後降爲肥如侯道武崩京師草泥出舉烽於安陽城北賀蘭部人皆往赴之明元卽位乃罷詔泥與元渾等八人拾遺左右與北新侯安同持節行并定二州劾奏并州刺史元六頭等皆伏罪州

郗肅然後從太武征赫連昌以功進爵爲琅邪公軍國大議每參豫焉又征蠕蠕爲別道將坐逐賊不進詐增虜當斬贖爲庶人久之拜光祿勳爲外都大官復本爵卒官子醜建襲

姚黃眉姚興之子明元昭哀皇后之弟也姚泓滅黃眉間來歸魏明元厚禮待之賜爵隴西公尙陽翟公主拜駙馬都尉隸戶二百太武卽位遷內都大官後拜太常卿卒贈雍州刺史隴西王諡曰獻陪葬金陵黃眉寬和溫厚希言得失太武悼惜之故贈禮有加

杜超字祖仁魏郡鄴人密皇后之兄也少有節操太常中爲相州別駕始光中太武思念舅氏以超爲陽平公尙南安長公主拜駙馬都尉位大鴻臚卿車駕幸其第賞賜巨萬神麇三年以超行征南大將軍太宰進爵爲王鎮鄴追加超父豹鎮東大將軍陽平景王母曰鉅鹿惠君眞君五年超爲帳下所害太武臨其喪哀慟者久之諡曰威王長子道生賜爵城陽侯後爲秦州刺史進爵河東公道生弟鳳凰襲爵加侍中特進太武追思超不已欲以鳳凰爲定州刺史鳳凰不願違離闕庭乃止鳳凰弟道備賜爵發于侯鎮枋頭除兖州刺史超旣薨復授超從弟遺侍中安南將軍開府相州刺史入爲內都大官進爵廣平王遺性忠厚頻歷州郡所在著稱薨贈太傅諡曰宣王長子元寶位司空元寶弟脩寶司隸校尉元寶又進爵京兆王及歸而父遺喪明當入謝元寶欲以表聞文成未知遺薨怪其遲召之元寶將入時人止之曰宣

以家憂自辭元寶欲見其寵不從遂買哀而入未幾以謀反伏誅親從皆斬唯元寶子世衡逃免時朝議欲追削超爵位中書令高允上表理之後兗州故吏汲宗等以道備遺惠在人前從坐爵受誅委骸土壤求得收葬書奏詔義而聽之贈散騎常侍安南將軍南康公諡曰昭世衝襲遺公爵

賀迷代人太武敬哀皇后之從父也皇后生景穆初后少孤父兄近親唯迷故蒙賜爵長鄉子卒贈光祿大夫五原公

閭毗代人蠕蠕主大檀之親屬太武時自其國來降毗卽恭皇后之兄也后生文成文成大安二年以毗爲平北將軍賜爵河東公弟紇爲寧北將軍賜爵零陵公其年並加侍中進爵爲王毗征東將軍評尙書事紇征西將軍中都大官自餘子弟賜爵爲王者二人公五人侯六人子三人同時受拜所以隆崇舅氏和平二年追諡后祖父延襄康公辰定襄懿王毗薨贈太尉追贈毗妻河東王妃子惠襲紇薨贈司空子豆後賜名莊太和中初立三長以莊爲定戶籍大使甚有時譽十六年例降爵後爲七兵尙書卒紇弟藥位外都大官冀州刺史江夏公卒先是文成以乳母常氏有保護功旣卽位尊爲保太后後尊爲皇太后興安二年太后前兄英字世華自肥如令超爲散騎常侍鎮軍大將軍賜爵遼西公弟嘉鎮軍大將軍嗣曹尙書帶方公三妹皆封縣君妹夫王睹爲平州刺史遼東公追贈冀祖父堅扶風太守亥爲鎮西將

軍遼西蘭公勃海太守澄爲侍中征東大將軍太宰遼西獻王英母許氏博陵郡君遣兼太常盧度世持節改葬獻王於遼西樹碑立廟置守冢百家太安初英爲侍中征東大將軍太宰進爵爲王喜左光祿大夫改封燕郡從兄泰爲安東將軍朝鮮侯訢子伯夫散騎常侍選部尙書次子員金部尙書喜子振太子庶子三年英領太師評尙書事內都大官伏寶泰等州刺史五年詔以太后母宋氏爲遼西王太妃和平元年喜爲洛州刺史初英事宋不能謹而嗜奉宋甚至就食於和龍無車牛宋疲不進嗜貢宋於虢至是宋於英等薄不如嗜之篇謂太后曰何不王嗜而黜英太后曰英爲長兄門戶主也家內小小不順何足追計嗜雖盡力故是他姓奈何在英上本州郡公亦足報耳天安中英爲平州刺史訢爲幽州刺史伯夫進爵范陽公英濶貨徙敦煌諸常自興公及至是皆以親疏受爵賜田宅時爲隆盛後伯夫爲洛州刺史以賊汙欺妄徵斬於京師承明元年徵英復官薨諡遼西平王始英之徵也夢日墜其所居黃山下水中村人以車牛挽致不能出英獨抱載而歸聞者異之後員與伯夫子禽可共爲飛書誣謗朝政事發有司執憲刑及五族孝文以明太后故罪止一門訢年老赦免歸家恕其孫一人扶養之給奴婢田宅其家僮入者百人金錦布帛數萬計賜尙書已下宿衛已上其女婿及親從在朝皆免官歸本鄉十一年孝文文明太后以文昭太后故悉出其家前後沒入婦女以喜子振試守正平郡卒

馮熙字晉國長樂信都人文明太后之兄也祖弘北燕王太武平遼海熙父朗內徙官至秦雍二州刺史遼西郡公坐事誅文明太后臨朝追贈黃鉞太宰燕宣王立廟長安熙生於長安爲姚氏魏母所養以叔父樂陵公邈因襲入蠕蠕魏母攜熙逃避至氏羌中撫育年十二好弓馬有勇幹氏羌皆歸附之魏母惡其如此將還長安始就博士學問從師受孝經論語好陰陽兵法事及長游華陰河東二郡間性汎愛不拘小節人無士庶來則納之熙姑先入掖庭爲太武左昭儀妹爲文成帝后卽文明太后也使人外訪知熙所在徵赴京師拜冠軍將軍賜爵肥如侯尙景穆女博陵長公主拜駙馬都尉出爲定州刺史進爵昌黎王獻文卽位爲太傅累拜內都大官孝文卽位文明太后臨朝帝乃承旨以熙爲侍中太師中書監領祕書事熙以頻履師傅又中宮之寵爲羣情所駭心不自安乞轉外任文明太后亦以爲然除都督洛州刺史侍中太師如故洛陽雖經破亂而舊三字石經宛然猶在至熙與常伯夫相繼爲州廢毀分用大至頽落熙爲政不能仁厚而信佛法自出家財在諸州鎮建佛圖精舍合七十二處寫十六部一切經延致名德沙門日與講論精勤不倦所費亦不貲而營塔寺多在高山秀阜傷殺人牛有沙門勸止之熙曰成就後人唯見佛圖焉知殺人牛也其北芒寺碑文中書侍郎賈元壽詞孝文頻登北芒寺親讀碑文稱爲佳作熙爲州因取人子女爲奴婢有容色者幸之爲妾有子女數十人號爲貪縱後授內都大官太師

如故熙事魏母孝謹如事所生魏母卒乃散髮徒跣水漿不入口三日詔不聽服熙表求依趙氏之孤帝以熙情難奪聽服齊衰期後以例降改封京兆郡公帝納其女爲后曰白武通云王所不臣數有三焉妻之父母抑言其一此所謂供承宗廟不欲奪私心然吾季著於春秋無臣證於往牒既許通體之一用開至尊之敬比長秋配極陰政既數未聞有司陳奏斯式可詔太師輟臣從禮又勅集書造儀付外孝文前後納熙三女二爲后一爲左昭儀由是馮氏寵貴益隆賞賜累巨萬帝每詔熙上書不臣入朝不拜熙上書如舊熙於後遇疾綿寢四載詔遣監問道路相望車駕亦數幸焉將遷洛帝親與熙別見其困篤獻歎流涕密敕宕昌公主遇曰太師萬一卽可監護喪事十九年薨於代車駕在淮南留臺表聞還至徐州乃舉哀爲制總服詔有司預辨凶儀并開魏京之墓令公主之柩俱向伊洛凡所營送皆公家爲備又敕代給綵帛前後六千匹以供凶用皇后詣代都赴哭太子恂亦赴代哭弔將葬贈假黃鉞侍中都督十州諸軍事大司馬太尉冀州刺史加黃屋左纁備九錫前後部羽葆鼓吹皆依晉太宰安平獻王故事有司奏諡詔曰可以威疆恢遠曰武奉諡於公柩至七里潤帝服纓往迎叩靈悲慟而拜焉葬日送臨墓所親作誌銘主生三子誕脩誕字思正脩字寶業皆資質妍麗年纔十餘文明太后俱引入禁中申以教誡然不能習讀經史兄弟並無學術徒整飾容儀寬雅恭謹而已誕與孝文同歲幼侍書學仍蒙親待尙帝妹樂

安長公主拜駙馬都尉侍中征西大將軍南平王脩侍中鎮北大將軍尚書東平公又除誕儀曹尚書知殿中事及罷庶姓王誕爲侍中都督中外諸軍事中軍將軍特進改封長樂郡公誕拜官孝文立於庭迺受其拜既訖還室脩降爲侯誕脩雖並長宮禁而性趣乖別誕性瀟灑脩乃浮競誕亦未能誨督其過然時言於太后孝文嚴責之至於楚鍾由是陰懷毒恨遂結左右有憾於誕者求藥欲因食害誕事覺帝自詣之具得情狀誕引過謝乞全脩命帝以誕父老又重其意不致於法撻之百餘黜爲平城百姓脩妻司空穆亮女也求離婚請免官帝引管蔡事皆不許帝寵誕仍作同輿而載同案而食同席坐臥彭城王勰北海王詳雖直禁中然親近不及十六年以誕爲司徒帝旣愛誕除官日親爲制三讓表并啟將拜又爲其章謝尋加車騎大將軍太子太師十八年帝謂其無師傅獎導風誕深自誨責從駕南伐十九年至鍾離誕遇疾不能侍從帝日省問醫藥備加帝銳意臨江乃命大軍發鍾離南轅與誕泣訣左右皆入無不掩涕時誕已懷然彊坐視帝悲而淚不能下言夢太后來呼臣帝嗚咽執手而出遂行是日去鍾離五十里許昏時告誕薨問帝哀不自勝時崔慧景裴叔業軍在中淮去所次不過百里帝乃輕駕西還從者數千人夜至誕薨所拊屍哀慟若喪至戚達旦聲淚不絕從者亦迭舉音帝以所服衣帽充襚親自臨視徹樂去膳宣敕大軍止臨江之駕帝親北度慟哭極哀喪至洛陽車駕猶在鍾離詔留守賜賻物布帛五千

匹穀五千斛以供葬事贈假黃鉞使持節大司馬領司徒侍中都督太師駙馬公如故加以殊禮備錫九命依晉大司馬齊王攸故事有司奏諡詔曰案諡法主善行德曰元柔尅有光曰懿昔貞惠兼美受三諡之榮忠武雙徽錫兩號之茂式準前訓宜契具瞻既自少綢繆知之惟朕案行定名諡曰元懿帝又親爲作碑文及挽歌詞皆窮美盡哀事過其厚車駕還京遂親至誕墓停車而哭使彭城王勰詔羣官脫朱衣服單衣介幘而哭司徒貴者示以朋友微者示如寮佐公主貞厚有禮度產二男長子穆字孝和襲熙爵避皇子愉封改封扶風郡公尙孝文女順陽長公主拜駙馬都尉歷員外通直散騎常侍穆與叔輔興不和輔興亡贈相州刺史祖載在庭而穆方高車良馬恭受職命言宴滿堂忻笑自若爲御史中尉東平王匡所劾後位金紫光祿大夫遇害河陰贈司空雍州刺史子罔字景昭襲爵昌黎王尋以庶姓罷王仍襲扶風郡公子峭字子漢齊受禪例降穆弟顯襲父誕長樂郡公脩弟聿字寶興廢后同產兄也位黃門郎信都伯後坐妹廢免爲長樂百姓宣武時卒於河南尹聿同產弟風幼養於宮文明太后特加愛念數歲賜爵至北平王拜太子中庶子出入禁闥寵侔二兄孝文親政後恩寵稍衰降爵爲侯幽后立乃復叙用后死亦冗散卒贈青州刺史崔光之兼黃門也與聿俱直光每謂之曰君家富貴大盛終必衰敗聿云我家何負四海乃昵我也光云以古推之不可不慎時熙爲太保誕司徒太子太傅脩侍中尙書聿黃門廢

后在位禮愛未施是後歲餘脩以罪棄熙誕喪亡后廢事退時人以爲盛必衰也

李惠中山人思皇后之父也父蓋少知名歷位殿中都官二尚書左將軍南郡公初太武妹武威長公主

故涼王沮渠牧犍之妻太武平涼州頗以公主通密計之助故寵遇差隆詔蓋尙焉蓋妻與氏以是出後

蓋加侍中駙馬都尉殿中都官尚書右僕射卒官贈征南大將軍定州刺史中山王諡曰莊惠弱冠襲父

爵妻襄城王韓頽女生二女長卽后也惠歷位散騎常侍中征西大將軍秦益二州刺史進爵爲王轉

雍州刺史征南大將軍加長安鎮大將軍惠長於思察雍州聽事有驚爭巢闕已累日惠令人掩護試命綱

紀斷之並辭惠乃使卒以弱竹彈兩鸞旣而一去一留惠笑謂吏屬曰此留者自計爲巢功重彼去者旣

經楚痛理無固心羣下伏其深察人有負鹽負薪者同釋重檐息樹陰二人將行爭一羊皮各言藉背之

物惠遣爭者出顧州綱紀曰此羊皮可拷知主乎羣下咸無答者惠令人置羊皮席上以杖擊之見少鹽

屑曰得其實矣使爭者視之負薪者乃伏而就罪凡所察究多如此類由是吏人莫敢欺犯後爲開府儀

同三司青州刺史王如故歷政有美績惠素爲文明太后所忌誣惠將南叛誅之惠二弟初樂與惠諸子

同戮後妻梁氏亦死青州盡沒其家財惠本無聲故天下冤惜焉惠從弟鳳爲定州刺史安縣王長樂主

簿後長樂以罪賜死時卜筮者河間邢瓚辭引鳳云長樂不軌鳳爲謀主伏誅唯鳳弟道念與鳳子及兄

弟之子皆逃免後遇赦乃出太和十二年孝文將爵舅氏詔訪存者而惠諸從以再離擊戮難於應命唯道念敢先詣闕乃申后妹及鳳兄弟子女之存者於是賜鳳子屯爵栢人侯安祖浮陽侯興祖安喜侯道念貞定侯從弟寄生高昌子皆加將軍十五年安祖昆弟四人以外戚蒙見詔謂曰卿之先世内外有犯得罪於時然官必用才以親非與邦之選外氏之寵超於末葉從今已後自非奇才不得復外戚譖班抽舉既無殊能今且可還後例降爵安祖等改侯爲伯並去軍號帝奉馮氏過厚於李氏過薄舅家了無叙用朝野人士所以竊議太常高閭顯言于禁中及宣武寵隆外家並居顯位乃惟孝文舅氏存已不霽恩澤景明末特詔興祖爲中山太守正始初詔追崇惠爲使持節驃騎將軍開府儀同三司定州刺史中山公太常考行上言案謚法武而不遂曰壯謚曰壯公興祖自中山遷燕州刺史卒以兄安祖子侃晞爲後襲先封南郡王後以庶姓罷王改爲博陵郡公侃晞爲莊帝所親幸拜散騎常侍嘗食典御帝之圖余朱榮侃晞與魯安等持刃於禁內殺榮及莊帝蒙塵侃晞奔梁

高肇字首文文昭皇太后之兄也自云本勃海衛人五世祖顧晉永嘉中避亂入高麗父颺字法脩孝文初與弟乘信及其鄉人韓內冀富等入魏拜厲威將軍河間子乘信明威將軍俱待以客禮遂納颺女是爲文昭皇后生宣武颺卒景明初宣武追思舅氏徵肇兄弟等錄尚書事北海王詳等奏颺宜贈左光祿

大夫賜爵渤海公諡曰敬其妻蓋氏宜追封清河郡君詔可又詔廢嫡孫猛襲渤海公爵封肇平原郡公肇弟顯澄城郡公三人同日受封始宣武末與舅氏相接將拜爵乃賜衣幘引見肇顯于華林都亭皆甚惶懼舉動失儀數日之間富貴赫奕是年咸陽王禧誅財物珍寶奴婢田宅多入高氏未幾肇爲尚書右僕射冀州大中正尙宣武姑高平公主遷尙書令肇出自夷土時望輕之及在位居要留心百揆孜孜無倦世咸謂之爲能宣武初六輔專政後以咸陽王禧無事構逆由是委肇肇旣無親族頗結朋黨附之者旬月超昇背之者陷以大罪以北海王詳位居其上構殺之又說宣武防衛諸王殆同囚禁時順皇后暴崩世議言肇爲之皇子昌薨衆謂王顯失於醫療承肇意旨及京兆王愉出爲冀州刺史畏肇恣擅遂至不軌肇又譖殺彭城王勰由是朝野側目咸畏惡之因此專權與奪任己又嘗與清河王懌於雲門外廡下忽忿譁大至紛紜太尉高陽王雍和止之高后旣立逾見寵信肇旣當衡軸每事任己本無學識動違禮度好改先朝舊制減削封秩抑黜勳人由是怨聲盈路矣延昌初遷司徒雖貴登台鼎猶以去要快快衆咸嗤笑之父兄封贈雖久竟不改瘞三年乃詔令還葬肇不自臨赴唯遣其兄子猛改服詣代還葬於鄉時人以肇無識哂而不責也及大舉征蜀以肇爲大將軍都督諸軍爲之節度與都督甄琛等二十餘人俱面辭宣武於東堂親奉規略是日肇所乘駿馬停於神獸門外無故驚倒轉臥渠中鞍具瓦解衆咸

怪異肇出惡焉四年宣武崩赦罷征軍明帝與肇及征南將軍元遙等書稱諱言以告凶問肇承變非唯
仰慕亦憂身禍朝夕悲泣至于羸悴將至宿瀨澗驛亭家人夜迎省之皆不相視直至闕下縗服號哭昇
太極殿盡哀太尉高陽王先居西柏堂專決庶事與領軍于忠密欲除之潛備壯士直寢刑豹伊盆生等
十餘人於舍人省下肇哭梓宮訖於百官前引入西廊清河王懌任城王澄及諸王等皆竊言目之肇入
省壯士擁而拉殺之下詔暴其罪惡稱爲自盡自餘親黨悉無追問削除職爵葬以士禮逮昏乃於廁門
出其尸歸家初肇西征行至函谷車軸中折從者皆以爲不獲吉還也靈太后臨朝令特贈營州刺史永
熙二年孝武帝贈使持節侍中中外諸軍事太師大丞相太尉公錄尚書事冀州刺史肇子植自中書侍
郎爲濟州刺史率州軍討破元愉別將有功當蒙封賞不受云家荷重恩爲國致効是其常節何足以膺
進陟之報懇惻發於至誠歷青相朔恒四州刺史卒植頻莅五州皆清能著稱當時號爲良刺史贈安北
將軍冀州刺史肇長兄琨早卒襲颺封渤海郡公贈都督五州諸軍事鎮東大將軍冀州刺史詔其子猛
嗣猛字豹兒尙長樂公主卽宣武同母妹也拜駙馬都尉歷位中書令出爲雍州刺史有能名入爲殿中
尙書卒贈司空冀州刺史孝武帝時復贈太師大丞相錄尚書事公主無子猛先在外有男不敢令主知
臨終方言之年幾三十矣乃召爲喪主尋卒無後琨弟偃字仲游太和十年卒正始中贈安東將軍都督

青州刺史謚曰莊侯。晉明四年，宣武納其女爲貴嬪。及于順皇后崩，永平元年立爲皇后。二年，八坐奏封后母王氏爲武邑郡君。偃弟壽早卒，壽弟卽肇也。肇弟顯侍中高麗國大中正卒。

胡國珍字世玉，安定臨涇人也。祖略，姚興渤海公。姚達平北府，諮議參軍。父深，赫連屈丐給事黃門侍郎。太武剋統萬深以降款之功，賜爵武始侯。後拜河州刺史。國珍少好學，雅尙清儉。太和十五年，襲爵例降爲伯女，以選入掖庭。生明帝卽靈太后也。孝明帝踐阼，以國珍爲光祿大夫、靈太后臨朝加侍中、封安定郡公。追崇國珍妻皇甫氏爲京兆郡君。置守冢十戶，尙書令任城王澄奏安定公宜出入禁中，參諮大務。詔屈公入決萬機。尋進位中書監儀同三司侍中。如故賜絹歲八百疋，妻梁四百匹。男女姊妹各有差國珍與太師高陽王雍、太傅清河王懌、太保廣平王懷入居門下同盤席。政詔依漢車千秋、晉安平王故事給步挽一乘，自掖門至于宣光殿，得以出入，并備几杖。後與侍中崔光俱授帝經侍，直禁中國。珍上表陳刑政之宜，詔皆施行。延和初，加國珍使持節都督雍州刺史。驃騎大將軍開府靈太后以國珍年老不欲令其在外，且欲示以方面之榮，竟不行。遷司徒公。侍中如故，就宅拜之。靈太后明帝率百寮幸其第宴會極歡。又追京兆郡君爲秦太上君，太上君景明三年薨於洛陽。於此十六年矣。太后以太上君墳瘞卑局更增廣爲起塋，城門闕碑表侍中崔光等奏按漢高祖母始謚曰昭靈夫人，後爲昭靈后。薄太后母曰靈